

fabantur. Ceciderunt in eo loco Joannes Grittus ductorum alter, vir impiger, ac sane strenuus: Nicolaus Balaster, Marcus Bonus, Andreas Thealdus, & Vendraminus Aquilejensis: multi præterea cum his obscuri nominis milites; pauci quidem, abjectis armis, per devia & abrupta loca ex tanta cæde dilapsi ad Quirinum venire: cui non multo post Dominicus Delphinus successit: quo Duce pax secuta est inter Venetos & Græcos. Ad quorum ingenia beneficio aliquo delinienda, quædam citra Musselam fluvium ad occasum, Sevasio & aliis defectionum auctoribus possidenda sunt data. Prædia quædam in insula esse constat, quæ equestris militiæ nomine emeritis tradantur, insulani *Caballarias* vocant; earum quasdam Græcorum principibus tempestate illa concessas, alias postea Theodoro & Michaëli Melissinis in fidem receptis datas reperio. Et hæc Ciano Duce domi forisque gesta: qui quum annos duos & viginti Rempubicam administrasset, essetque jam ob senectutem publicis negociis parum omnino utilis, sponte se magistratu abdicavit: atque intra paucos dies ad Georgii fanum, quo religionis causa transiverat, sæliciter vita decessit. Ejus corpus in paterno sepulchro conditum.

Jacobus Tepulus in demortui locum quadragintavirali suffragio suffectus. Hujus quoque Principatu res in Creta parum quietæ fuerunt: de quibus pergam breviter dicere, priusquam ad alia quæ ipsius auspiciis domi forisque sunt gesta, transeamus. Nimia Venetorum in Cretenses indulgentia effecit, ut Græcorum ingenia (quæ ingenita quadam levitate laborare creduntur) non modo non obsequentiora Veneto sint facta imperio, sed longe etiam infestiora. Non utitur pravum ingenium aliena patientia, sed abutitur: nec obsequio ullo aut gratia movetur, sed severitate potius & supplicio. Multa igitur peccandi licentia, omni pudore abjecto, Scordili in primis & Mellissini omnia latrociniiis infestare cœperunt, rapere jam aperte, spoliare, grassari, nihil tutum relinquere cuiquam: & jam omnia cædibus & rapinis compleverant, quum ea rerum indignitate Dux commotus continuo Cretensem militem conscripsit.

Misit

Ciani mors.

1229

In locum
ejus surroga-
tur Jacobus
Tepulus.
Novi Insu-
lanorum
motus ite-
rum Venet-
os bellum
reparare
cœgerunt.
Cretensium
ingenium.